

Dr. Hororoso Oradibay hospital, mas popular cu nunca

E dianan cu ta tras di lomba, ta masha reclamo tin riba e hospital nobo **Dr. Hororoso Oradibay Hospital**, cu a tuma lugar di e hospital cu nos tur tabata orguyoso di dje, **Dr. Horacio Oduber Hospital**.

Ora hende keha cerca mi riba hospital, mi semper ta gana ora mi bisa nan cu mi ta sigur cu nan no a bay hospital.

Ora nan puntra ta di con mi sa, mi ta contesta: **"pasobra mi no a mira bo nomber, ni potret, den anuncio di morto"**.

Ta net esaki ta e impresion cu hende ta hayando ultimo dianan, siman nan y añanan.

Conseho number un: **"no yega hospital sushi, lomba sunu y cu paña kibra"**.

No ta importa kico a pasabo cu bo ta bisti asina. **"Bo no ta merece trato medico den hospital"** cu ta pa hende limpi so nan ta pensa.

Conseho number dos: **"Si bo tin cabey na vlecht estilo rasta, no ta importa si bo tin tur placa di mundo, si bo ta de lo mas decente cu ta etc. Bo ta rasta y no merece trato medico den hospital,"** den cual rasta tambe ta marca.

E impresionnan aki ta ser crea ora tende e historianan di **Hororoso Oradibay Hospital**.

MIHOR SERVICIO NA MUNDO DEN HOSPITAL

Bo ta yega poli haya rij di hende sperando.

Un señora di 80 aña sperando pa tratamiento y kehando di dolor.

Broeder ta drenta cu un baby den braza.

Ora puntre pa un hende pa atende **"Machi"**, bo ta haya como contesta: **"E baby aki tin keintura. Ta awor su bida ta cuminza. Bida di e machi ta bayendo caba."**

Den hospital **Dr. Hororoso Oradibay Hospital**, e frase di dia den boca di docter, especialista, broeder y zuster ta: **"Het is een ouwe vrouw"** of bo ta tende **"het is een ouwe man"**.

Machi ta wordo trata porfin y a haya **"antibiotica"** pa e traha lugar pa otro patient wordo trata.

No tin tempo pa examina Machi, ni saca potret.

"Ta algo robex e lo a come."

Un dia despues Machi ta morto. Su apendix a kibra.

E otro patient ta Pachi di 77 aña cu a cay na cas riba rudia.

Dolor tabata mata pachi.

El a haya un hangua y manda cas cu un recept di botica pa pildora pa kita dolor, un antibiotica, 2 sorto di vitamina 3 biaha pa dia, un botter di remedi pa stoma, y un caha di aspirine pa yuda su curazon.

Pia a keda bira peor, el a hincha, bira colorman di regenboog y Pachi ta bolbe hospital.

Pachi ta ser hinca den un camber, y despues di dos dia especialista ta yega pa determina cu tin un infeccion y mester baña e pia cu alcohol.

Dianan ta pasa, te cu Pachi a cuminza bebe e alcohol pa kita dolor.

Dolor ta sigui mata Pachi te cu familia a dicidi di busca manera pa manda Pachi Colombia.

Aki ta resulta cu en berdad e rudia a cohe infeccion, pasobra e weso a kibra cu e golpi ricibi y si a warda un dia mas, Pachi lo a muri.

Back na Aruba ta pone hospital y especialista na altura cu e tata a scapa.

Esaki ta pica mortal pa e familia: **"tur sorto di zundra bo ta haya pasobra bo no tabata tin confianza den nos docternan di cas, den nos specialistanan, den nos Dr. Hororoso Oradibay Hospital"**

Djis menciona na un docter of na hospital cu bo ta bay afo como patient of cu un patient.

"Abo y bo familia ta keda marca pa semper".

No menciona tampoco cu bo kier opinion di otro docter tambe.

Ta como si fuera bo a cambia **"religion catolico"** pa **"religion di satanas"**.

E MALDITO BACTERIA MRSA

Ata Toonchi, Marietjie, Pa, Mai, of Padoei of Madoei den hospital, y infecta cu bacteria MRSA

Awor si bo ta pa bo cuenta.

Docter por pasa un biaha den tanto dia, y ta na porta e ta keda para: **"Zuster conta bay cu e patient?"**... **"Mi ta bolbe despues"**.

E despues ta despues di tanto dia, pero e nota drenta camber. Ta zuster cu broeder ta bisti manera astronauta ey den pa spanta bishita.

Pero pa e periodo cu bo a keda den hospital e cuenta di especialista ta muestra cobranza pa tur dia cu el a para na porta y remedi cu nunca a yega cerca e patient.

Bo no ta compronde e **"jargon medico"** to, corda pa lesa loke ta skirbi.

Esaki ta ora e patient ta for di tino.

Ora patient recobra su tino y e muestra su nervionan, mes ora ta yama Psychiater pa duna un pildora **"di nervio"**.

Si familia no a sake manda Venezuela of Colombia e lo a termina den PAAZ sigur.

Tur sacrificio ta ser haci, y ta manda e patient Colombia.

Ta resulta cu e ta haya antibiotica pa e MRSA y cu ta 500 florin pa 10 pildora.

E ta bolbe Aruba y ta resulta cu mester cana un caminda di cruz pa mira si AZV ta cubri esaki (mientras cu e bacteria ta keda den su curpa.)

E por a bay afo pasobra familia por a logra.

Esnan cu no por?

Si bo no por bay afo, y bo ta muriendo pasobra bo no ta ricibi e tratamiento, of no tin tratamiento pa bo malesa na Aruba, bo ta muri tranquil.

Si no tin tratamiento na Aruba y pa spaar kibramento di cabez; **"lague muri numa, nos ta fabrica complicacionnan cu e familia no ta compronde tog"**.

Bay gobierno pa yudanza?

Stop di papia palabra malo !!!

Bo tin cu pasa via e **Comision** cu ta Juzga malesanan, cu mester haya recomendacion di e **Comision** cu nan ta forma pa conseha riba re-

comendacionnan, y e **Comision** aki mester busca recomendacion cerca e **Comision** cu mester recomenda specialistanan, y haya conseho di

specialistanan cu mester acerca **Comision** di... (depende ken bo ta)

Asina por keda, te ora e patient **"a baster"** y ta dera caba.

Pa un cita ta peor ainda, pasobra pa un simpel griep cu keintura 50 grado, bo tin cu warda 3 siman.

Ora bo bisa cu prome cu e fecha ey bo por muri, bo ta haya como contesta: **"E ora ey bo ta avisa bo señora cancela e cita"**.

Bo ta yega poli cu un patient casi for di tino. Ta tuma contacto cu especialista y bo ta tende e trahador di poli na telefon: **"Si docter, su curpa ta friu. E no ta tembla di calafriu, su casa a bisa cu ayera anochi e tabata masha cayente"**.

E ta drey rond bisabo cu **"docter ta na caminda"**. 4 ora despues e ta yega si bo tin suerte di keda na bida.

Excusanan tin masha hopi den **Dr. Hororoso Oradibay Hospital**.

"Bo mester ta contento cu el a sali na bida, y cu mi permiso firma".

"Nos no por a trata e patient adecuadamente pasobra el a nenga autopsia".

"E problema ta cu e patient no tabata tin historia anterior di suicidio of intento di suicidio. Pesey no por a trate".

"E no tabata kier mamogram pasobra e no tabata tin placa pa hinca su pechonan den envelop y manda nan pa hospital via Postkantoor".

"El a nenga di gorgel, pesey nos no por a nota si su garganta ta lek pa por hinca un zet pil aden".

Bo ta tende palabranan manera **Benigno, Arteria, Bacteria, Seccion Cesarea, cat-scan, Enema, impotente, staff medico, pap test, pel-vis, rectum, tablet, terminal, tumor, etc.** y abo mester busca pa sa kico ta kico cerca conocirnan.

Benigno ta loke bo ta bira despues di 8, **Arteria** ta arte di pintura, **Bacteria** ta parti patras den cafetaria, **Seccion Cesarea** ta un bario na Roma, **Cat-scan** ta ora cu nan ta busca un pushi perdi den hospital, **Enema** ta cu bo tin un enemigo den hospital, **Impotente** ta cu bo ta un

persona distingui y popular, **Staff medico** ta e wandelstok cu docternan ta cana cune, **Pap test** ta test cu bo ta haci ora bo kier bira tata, **Pelvis** ta sintoma di malesa di Elvis, **Rectum** ta remedi pa stoma, **Tablet** ta mesa chiquito den oficina di docter, **Terminal** ta ora cu bo tin bay aeropuerto pa tratamento den exterior, **Tumor** ta mas di un malesa (2 more of two more), etc. etc.

MEDICINA NA ARUBA A CAMBIA POCO

Si wak bon, den 500 aña ta solamente 5 cambio tabata tin den medicina na Aruba.

Di aña 500 pa 1800 bo ta cura si bo kauw riba raiz di esaki of raiz di esaya.

Di aña 1800 pa 1850 misioneronan a cuminza splica nos pa cuminza bisa pa haci oracion pasobra raiz ta venenoso.

Di aña 1850 pa 1900 a cuminza duna remedi pa bebe pasobra oracion ta supersticion.

Di aña 1900 pa 1950, pa cura mester tuma pildora pasobra remedinan di bebe ta zeta di slijm di cascabel.

Di aña 1950 pa 2000 pa cura mester tuma antibiotica pasobra pildora ta inefectivo.

Di 2000 en adelante ta tende mihor remedi ta raiz di esaki of raiz di esaya, no bay docter, ni bay hospital.

Laga nos spera cu nos **Hospital Dr. Horacio Oduber** lo no cay den e imagen di **Dr. Hororoso Oradibay Hospital** pasobra esey no ta deseo di e pueblo di Aruba.

No ta tur docter di cas, docter na hospital, especialista, internista, ciruhano, broeder of zuster ta malo.

No laga nos generaliza.

Nan ta haciendo nan best pa duna nos lo mihor, erronan ta ser cometi, pero mester ta habri y honesto cu hende.

Esaki ta falta hopi, e honestidad.

E pueblo kier medicina di nivel, trato husto y corecto, trato personal decente, cumplimiento cu huramentacion di mediconan y **no dori na prome lugar** y despues huramentacion. E pueblo kier trato igual pa tur persona y kier mira mas sonrisa den hospital.

E tendencia den hospitalnan rond di mundo awendia ta pa **"trece e sonrisa ey cerca tanto trahadornan como patientnan"**.

Ta pesey mi tabata kier pa mi lectornan hari poco awe tambe.

Juby Naar